

四庫全書

史部

欽定四庫全書

史部
通典卷八至十

詳校官侍郎_臣李封

編修_臣程嘉謨覆勘

覆校官助教_臣吳省蘭

校對官中書_臣田尹衡

謄錄舉人_臣陳寶

欽定四庫全書

通典卷八

唐 京兆杜佑 君卿纂

食貨八

錢幣上

周 秦 漢 後漢 晉

貨幣之興遠矣夏商以前幣為三品

珠玉為上幣黃金為中幣白金為下

幣白金為銀

太公立九府圜法周景以母子相權秦用黃金

銅錢為上下二等漢興為八銖或為莢錢或作白金或

作赤仄八銖五分迭廢迭用王莽又設錯刀金銀龜貝凡數十品公孫述始作鐵錢魏文帝穀帛相貿劉備以一當百孫權以一當千理道陵夷則有鵝眼綆環之別王綱解紐又有風飄水浮之異名目繁雜不能徧舉緬徵損益可略而言原夫立錢之意誠深誠遠凡萬物不可以無其數既有數乃須設一物而主之其金銀則滯於為器為飾穀帛又苦於荷擔斷裂唯錢可貿易流注不佳如泉若穀帛為市非獨提挈斷裂之弊且難乎銖

兩分寸之用歷代錢貨五銖為中一品獨行實臻其要
今錢雖微重於古之五銖大小斤兩便於時矣太公既
立之於周退行之於齊曰知開塞之術者其取天下如
化是謂政之大端矣又管仲曰三幣握之非有補於溫
飽也捨之非有切於饑寒也先王以守財物以御人事
而平天下也命之曰衡衡者使物一高一下不得有常
故與奪貧富皆在君上是以人戴君如日月親君若父
母用此道也夫生殖衆則國富而人安農桑寡則人貧

而國危使物之重輕由令之緩急權制之術實在乎錢
鍵其多門利出一孔摧抑浮浪歸趣農桑可致時雍躋
於仁壽豈止於富國強兵者哉

具輕重篇

其後言事者或惜

銅愛工改作小錢或重號其價以求贏利是皆昧經通
之遠旨令盜鑄滋甚棄南畝日多雖禁以嚴刑死罪日
報不能止也昔賢有云銅不布下乃權歸於上誠為篤
論固有國之切務救弊之良算也况當今人疲賦重康

俗濟用莫先於斯矣

自昔言貨幣者在於圖史形模皆不達其要唯漢賈生國朝劉錄事

秩頗詳
其旨

自神農列鄺於國以聚貨帛日中為市以交有

無虞夏商之幣金為三品或黃或白或赤或錢或布或

刀或龜貝

凡貨金錢布帛之用
夏殷以前其詳靡記

○周制以商通貨以賈

易物太公又立九府圜法

周官有太府玉府內府外府
泉府天府職內職幣職金皆

掌財幣之官故云九
府圜謂均而通也

黃金方寸而重一斤錢圜函方

外

而內輕重以銖

黃金以斤為名
錢以銖為重也

布帛廣二尺二寸為幅

長四丈為疋故貨實於金利於刀流於泉

流行
如泉

布於布

布於
民間

束於帛

束聚

周景王時患錢輕將更鑄大錢

錢者
金幣

之名先曰泉後曰錢大於舊錢其價重也班固以為文曰寶貨韋注國語云徑一寸二分重十二銖文曰大泉

五十未詳孰是故兩存焉

大夫單旗曰不可古者天降災戾

戾惡氣也一日

戾至也於是乎量資幣權輕重以賑救民民患輕則為之

作重幣以行之於是有母權子而行民皆得焉若不堪

重則多作輕而行之亦不廢重於是乎有子權母而行

小大利之

民患幣重則多作輕錢而行之亦不廢去重者言重者行其貴輕者行其賤

今王

廢輕而作重民失其資能無匱乎民若匱王用將有所

乏之將厚取於民民不給將有遠志

謂去其本居而散

是離民

也且絕民用以實王府猶塞川原為潢沔也

原謂水泉之本潢音

黃沔音烏

竭亡日矣王其圖之弗聽卒鑄大錢文曰寶貨肉

好皆有周郭

內郭為好外郭為肉韋昭曰肉錢形也好孔也

以勸農贍不足百

姓蒙利焉

單旗雖有此言王終自鑄錢果有便故百姓蒙利

管子曰人君鑄錢

立幣人庶之通施也

錢幣無補於饑寒之用人君所立以均制財物通交有無使人所求

各得其欲

人有若千百千之數矣然而人事不及用不足者

何利有所藏也

人事謂常費也言人之所有多少各隨其分而自足君上不能均調其事則豪

富并藏財貨專擅其利是故人之常費不給以致匱乏

然則人君非能分并財利

而調人事也則君雖自為鑄幣而無已乃使人下相役

耳惡能以為理乎

言人君若不能權其利門制其輕重雖鑄幣無限極而與人徒使豪富侵

奪貧弱終不能致理也惡音烏

又曰湯七年旱禹五年水人之無糴

糴

也糴章延反

有賣子者湯以莊山之金鑄幣而贖人之無糴

賣子者禹以歷山之金鑄幣以救人之困夫玉起於禺

音虞

氏金起於汝漢珠起於赤野東西南北去周七八千

里水絕壤斷舟車不能通為其途之遠其至之難故託

用於其重以珠玉為上幣以黃金為中幣以刀布為下

幣三幣握之則非有補於煖也食之則非有補於飽也

先王以守財物以御人事而平天下也是以命之曰衡

衡者使物一高一下不得有調也

若五穀與萬物平則人無其利故設上中

下之幣而行輕重之術使一高一下乃可權制利門悉歸於上

楚莊王以為幣輕更以

小為大百姓不便皆去其業孫叔敖為相市令言於相

曰市亂人莫安其處行不定叔敖白於王遂令復如故

而百姓乃安也荀卿曰北海則有走馬吠犬焉然而中

國得而畜使之南海則有羽翮齒革焉然而中國得而

賦之東海則有紫蛤魚鹽焉然而中國得而衣食之西
海則有皮革文旄焉然而中國得而用之故天之所覆
地之所載財貨流通無不盡致其用四海之內若一家
也凡理亡者使有利者使阜害者使亡靡者使微王之
所寶者六聖人能制議百物以輔相國家則寶之玉足
以庇廕嘉穀使無水旱之災則寶之龜足以獻臧否則
寶之珠足以禦火災則寶之金足以禦兵亂則寶之山
林藪澤足以備財用則寶之○秦兼天下幣為二等黃

金以鎰為名上幣

二十兩為鎰改周一斤之制更以鎰為金之名數

銅錢質如

周錢文曰半兩重如其文為下幣

言錢之形質如周錢唯文異耳

而珠

玉龜貝銀錫之屬為器飾寶藏不為幣然各隨時而輕

重無常○漢興以為秦錢重難用更令民鑄英錢

如榆莢也

錢重銖半徑五分文曰漢興

黃金一斤

復周之制更以斤為名

高后二年行八

銖

秦錢文曰半兩即八銖也初漢以其太重更鑄榆莢人患太輕至此復行八銖錢

六年行五

分錢

徑五分所謂英錢

孝文五年為錢益多而輕乃更鑄四銖

錢其文為半兩除盜鑄錢令使民放鑄賈誼諫曰法使

天下公得顧租鑄銅錫為錢敢雜以鉛鐵為他巧者其

罪黥

顧租謂顧庸之直或租其本

然鑄錢之情非殺雜為巧則不可

得贏而殺之甚微為利甚厚

微謂精妙也其術精妙不可覺知而得利甚厚故令

人輕犯之姦不可止也

夫事有召禍而法有起姦今令細民操造

幣之勢

操持也

各隱屏而鑄作因欲禁其厚利微姦雖黥

罪日報其勢不止

報論也

夫懸法以誘民使入陷阱孰積

於此曩禁鑄錢死罪積下

下報也累積下報論之也

今公鑄錢黥罪

積下為法若此上何賴焉

賴利也特也

又民用錢郡縣不同

或用輕錢百加若干

時錢重四銖法錢百枚當重一斤十六銖輕則以錢足之若干枚今

滿平也若干且設數之言也干猶箇謂當如此箇數耳

或用重錢平稱不受

用重錢則

平稱有餘不能受也

法錢不立

依法之錢也

吏急而一之乎則大為煩

苛而力不能勝縱而弗呵乎則市肆異用錢文大亂

呵責

怒也苟非其術何嚮而可哉今農事棄捐而采銅者日蕃

釋其耒耨冶鎔炊炭

鎔形容也謂作錢模也

姦錢日多五穀不為

多

言皆采銅鑄錢廢其農業故五穀不為多

國知患此吏議必曰禁之禁之

不得其術其傷必大令禁鑄錢則錢必重重則其利深

盜鑄如雲而起棄市之罪又不足以禁矣姦數不勝而法禁數潰銅使之然也故銅布於天下則人鑄錢者大抵必雜以鉛鐵黥人日繁一禍也偽錢無止錢用不信人愈相疑二禍也采銅者棄其田疇鑄者損其農事五穀不為多則隣於饑三禍也故不禁鑄錢則常亂黥罪日積是陷阱也且農事不為有類為災故人鑄錢不可不禁四禍也上禁鑄錢必以死罪鑄錢者禁則錢必還重則盜鑄者起則死罪又復積矣其禍五也故銅布於

天下其為禍博矣今博禍可除而七福可致矣何謂七

福上收銅勿令布則民不鑄錢黥罪不積一矣偽錢不

蕃民不相疑二矣采銅鑄作者反於耕田三矣銅畢歸

於上上挾銅積以御輕重

銅積謂多積銅

錢輕則以術斂之重

則以術散之貨物必平四矣以作兵器

古者以銅為兵也秦銷鋒鏑鑄

金人十

二是也以假貴臣多少有制用別貴賤五矣以臨萬貨

以調盈虛以收奇羨

奇殘餘羨饒溢

則官富實而末民困六矣

末謂工商之業也

制吾棄財以與匈奴逐爭其民則敵必壞七

矣末業既困農人敦本倉廩實布帛有餘則招胡人多來降附故言制吾棄財也棄財謂可棄之財逐競也

今久退七福而行博禍臣誠傷之上不聽是時吳以諸

侯即山鑄錢富埒天子

埒等也所鑄文字與四銖同微重耳

後卒叛逆鄧

通大夫也以鑄錢

文字稱兩同四銖

財過王者故吳鄧錢布天

下孝武帝有事於四夷又徙平民七十萬口於新秦中

用度廣出御府錢以贍不足而冶鑄或累萬金不佐公

家之急於是天子與公卿議更造錢幣以贍用而摧浮

淫并兼之徒是時禁苑有白鹿而少府多銀錫自孝文

更造四銖錢至是歲四十餘年從建元以來用少縣官

往往即多銅山而鑄錢民間亦盜鑄不可勝數錢益多

而輕

鑄錢者多故錢輕輕亦賤也

物益少而貴

民但鑄錢不作餘物故少

有司言

曰古者皮幣諸侯以聘享金有三等黃金為上白金為

中赤金為下今半兩錢法重四銖

文為半兩實重四銖

而姦或盜

磨錢質而取鉛

民盜磨錢質而取鉛鉛銅屑也磨錢漫面以取其屑更以鑄錢西京黃圖敘曰

民磨錢取屑是也鉛音浴

錢益輕薄而物貴則遠方用幣煩費不省

乃以白鹿皮方尺緣以藻績

一作紫績繡繪五采而為

為皮幣直四

十萬王侯宗室朝覲聘享必以皮幣薦璧然後得行管子

曰桓公朝周請天子號令諸侯以石璧賀獻又造銀錫此亦鹿皮銀錫為幣之義也諸具輕重篇

為白金雜鑄銀錫以為白金以為天用莫如龍地用莫如馬人用

莫如龜故白金三品其一曰重八兩圜之其文龍名曰

白選或名白撰直三千二曰以重差小方之其文馬直五百

以半斤之重差為三品此重六兩則下品重四兩三曰復小橢之其文龜直三

百橢圜而長令縣官銷半兩錢更鑄三銖錢文如其重盜鑄

諸金錢罪皆死而吏民之盜鑄白金者不可勝數有司

言三銖錢輕易姦詐乃更請郡國鑄五銖錢周郭其下

令不可磨取鎔焉

周匝為郭文漫皆有

造白金五銖錢後五歲赦

吏民之坐盜鑄金錢死者數十萬人其不發覺相殺者不可勝計赦自出者百餘萬人然不能半自出天下大

抵無慮皆鑄金錢矣

抵歸也大歸猶言大凡也無慮亦謂大率無小計慮也

犯法

者衆吏不能盡誅於是遣博士褚大徐偃等分行郡國

舉并兼之徒守相為利者劾之

時張湯用事初帝既與湯造白鹿皮幣以問大

司農顏異對曰今王侯朝賀以蒼璧直數千而皮薦反四十萬本末不相稱上不悅會有人告異以他事議下

湯理異與客語客語初令下有不便者異不應於是
徵反屑湯奏異見令不便不入言而腹誹遂誅

公卿大夫多諂諛取容郡國多姦鑄錢錢多輕而公卿

請令京師鑄官赤仄

以赤銅為其郭今錢見有赤側者不知作法云何

一當五

賦官用非赤仄不得行

充賦及給官用皆令以赤仄

白金稍賤民不

實用縣官以令禁之無益歲終廢不行其後二歲赤

仄錢賤民巧法用之不便又廢於是悉禁郡國鑄錢專

令上林三官鑄錢既多而令天下非三官錢不得行

漢武

帝元鼎二年初置水衡都尉掌上林苑屬官有上林
均輸鍾官辦銅令然則上林三官其是此三令乎

諸

郡國前所鑄錢皆廢銷之輸入其銅三官而民之鑄錢
益少計其費不能相當唯真工大姦乃盜為之元帝時
貢禹言鑄錢采銅一歲十萬人不耕民坐盜鑄陷刑者
多富人藏錢滿室猶無厭足民心動搖棄本逐末耕者
不能半姦邪不可禁原起於錢疾其末者絕其本宜罷
采珠玉金銀鑄錢之官毋復以為幣除其販賣租銖之
律

租銖謂計其賣物價
平其錙銖而收租也

租稅祿賜皆以布帛及穀使百

姓壹意農桑議者以為交易待錢布帛不可尺寸分裂

禹議亦寢自孝武元狩五年三官初鑄五銖錢至平帝
元始中成錢二百八十億萬餘云王莽居攝變漢制以
周錢有子母相權於是始造大錢徑一寸二分重十二
銖文曰大錢五十又造契刀錯刀契刀環如大錢身形
如刀長二寸文曰契刀五百錯刀以黃金錯其文曰一
刀直五千

此錢今並尚在形質及文與漢書相合無差錯也

與五銖錢凡四品

並行莽即真以為書劉字有金刀乃罷錯刀契刀及五
銖錢而更作金銀龜貝錢布之品名曰寶貨小錢徑六

分重一銖文曰小錢直一次七分三銖曰么錢一十小么

也次八分五銖曰幼錢二十次九分七銖曰中錢三十

次一寸九銖曰壯錢四十因前大錢五十是為錢貨六

品直各如其文黃金重一斤直錢萬朱提銀重八兩為

一流直一千五百八十朱提縣名屬犍為出善銀朱音殊提音上支反他銀一

流直千是為銀貨二品元龜距冉長尺二寸冉龜甲緣也距至也

度甲兩邊緣直二千一百六十為大貝十朋兩貝為朋朋直二百

一十六元龜十朋公龜九寸直五百為壯貝十朋侯龜

七寸以上直三百為么貝十朋子龜五寸以上直百為小貝十朋是為龜寶四品大貝四寸八分以上二枚為一朋直二百一十六壯貝三寸六分以上二枚為一朋直五十么貝二寸四分以上二枚為一朋直三十小貝寸二分以上二枚為一朋直十不盈寸二分漏度不得為朋率枚直錢三是為貝貨五品大布次布第布壯布中布差布厚布幼布么布小布長寸五分重十五銖文曰小布一百自小布以上各相長一分相重一銖文各

為其布名直各加一百上至大布長二寸四分重一兩

而直千錢矣是為布貨十品

布亦錢

凡寶貨五物六名二

十八品鑄作錢布皆用銅殺以鍾錫

許慎云鍾銅屬也然則以鍾及雜銅

而為錢也
鍾音連

文質周郭放漢五銖錢云

依倣

其金銀與他物

雜色不純好龜不盈五寸貝不盈六分皆不得為寶貨

元龜為蔡非四民所得居有者入太卜受直其後百姓

憤亂其貨不行民私以五銖錢市買莽患之下詔敢挾

五銖錢者為惑眾投諸四裔於是農商失業食貨俱廢

民涕泣於市道坐賣買田宅奴婢鑄錢抵罪者自公卿大夫至庶人不可稱數莽知民愁廼但行小錢直一與大錢五十二品並行龜貝布屬遂廢莽天鳳元年復申下金銀龜貝之貨頗增減其價直而罷大小錢改作貨布長二寸二分廣一寸首長八分有奇廣八分其圓好徑二分半足枝長八分間廣二分其文右曰貨左曰布重二十五銖直貨泉二十五貨泉徑一寸重五銖文右曰貨左曰泉枚直一與貨布二品並行又以大錢行久

罷之恐民挾不止廼令民且獨行大錢與新貨泉俱枚
直一並行盡六年毋得復挾大錢矣每一易錢民用破
業而大陷刑莽以私鑄錢死及非沮寶貨投四裔犯法
者多不可勝行廼更輕其法私鑄作泉布者與妻子沒
為官奴婢吏及比伍知而不舉告與同罪

比音頻
未反

非沮

寶貨民罷作一歲吏免官犯者愈衆及五人相坐皆沒

入郡國檻車鐵鐐傳送長安鍾官

鍾官主
鑄錢者

愁苦死者十

六七漢錢舊用五銖自王莽改革百姓皆不便之及公

孫述廢銅錢置鐵官鑄鐵錢百姓貨幣不行

皇甫謐高士傳曰郭

泰過史弼送迎輒再屈腰泰一傳揖而去弼門人怪而問之弼曰鐵錢也故以二當一耳

時童謠曰

黃牛白腹五銖當復好事者竊言王莽稱黃述欲繼之

故稱白腹五銖漢貨言漢當復并天下○後漢光武除

王莽貨泉自莽亂後貨幣雜用布帛金粟建武十六年

馬援上書曰富國之本在於食貨宜如舊鑄五銖錢帝

從之於是復鑄五銖錢天下以為便及章帝時穀價貴

縣官經用不足朝廷憂之尚書張林言今非但穀貴百

物皆貴此錢賤故爾宜令天下悉以布帛為租市買皆用之封錢勿出如此則百物皆賤矣帝用其言少時復止和帝時有上書言人以貨輕錢薄故致貧困宜改鑄大錢事下四府羣僚及太學能言之士孝廉劉陶上議曰當今之憂不在於貨在乎民饑蓋民可百年無貨不可一朝有饑故食為至急也議者不達農殖之本多言鑄冶之便或欲因緣行詐以賈國利國利將盡取者爭競造鑄之端於是乎生蓋萬人鑄之一人奪之猶不能

給況今一人鑄之則萬人奪之乎夫欲民殷財阜要在止役禁奪則百姓不勞而足陛下欲鑄錢齊貨以救其弊此猶養魚沸鼎之中棲鳥烈火之上帝竟不鑄錢及靈帝作五銖錢而有四出道連於邊緣有識者尤之曰豈非京師破壞此四出散於四方乎至董卓焚宮室乃劫鑾駕西幸長安悉壞五銖錢更鑄小錢大五分盡取洛陽及長安銅人飛廉之屬充鼓鑄其錢無輪郭文章不便時人由是貨輕而物貴穀一斛至錢數百萬曹公

為相於是罷之還用五銖是時不鑄錢既久貨本不多
又更無增益故穀賤而已○魏文帝黃初二年罷五銖
錢使百姓以穀帛為市買至明帝代錢廢穀用既久人
間巧偽漸多競濕穀以要利作薄絹以為市雖處以嚴
刑而不能禁也司馬芝等舉朝大議以為用錢非徒豐
國亦所以省刑今若更鑄五銖於事為便帝乃更立五
銖錢至晉用之不聞有所改創

蜀先主劉備攻劉璋與
士眾約若事定府庫百

姓孤無取焉及拔成都士眾皆捨干戈赴諸庫藏取寶
物軍用不足備甚憂之西曹掾劉巴曰易耳但當鑄錢

一直百錢平諸物價令吏為官市備從之數月之間府庫充實文曰直百亦有勃為五銖者大小秤兩如一焉並徑七分重四銖吳孫權嘉平五年鑄大錢一當五百文曰大泉五百徑一寸三分重十二銖而使吏人輸銅計鑄畢設盜鑄之科赤烏元年鑄一當千大錢徑一寸四分重十六銖故呂蒙定荊州孫權賜錢一億錢既太貴但有空名人間患之後權令曰往日鑄大錢云以廣貨故聽之今聞人意不以為便其省之鑄為器物官勿復出也私家有者並以輸

○晉元帝過江用孫氏赤烏

舊錢輕重雜行大者謂之比輪中者謂之四文吳興沈充又鑄小錢謂之沈郎錢錢既不多由是稍貴孝武帝太元三年詔曰錢國之重寶小人貪利銷壞無已監司

當以為意廣州夷人寶貴銅鼓而州境素不出銅聞官私賈人皆貪比輪錢斤兩差重以入廣州貨與夷人鑄鑄作鼓其重為禁制得者科罪安帝元興中桓玄輔政立議欲廢錢用穀帛孔琳之議曰洪範八政貨為食次豈不以交易之所資為用之至要者乎若使百姓用力於為錢則是妨為生之業禁之可也今農自務穀工自務器各隸其業何嘗致勤於錢故聖王制無用之貨以通有用之財既無毀敗之費又省運致之苦此錢所以

嗣功龜貝歷代不廢者也穀帛本充於衣食今分以為
貨則致損甚多又勞毀於商販之手耗棄於割截之用
此之為弊著於目前故鍾繇曰巧偽之人競濕穀以要
利制薄絹以充貨魏代制以嚴刑弗能禁也是以司馬
芝以為用錢非徒豐國亦所以省刑錢之不用由於兵
亂積久自致於廢有由而然漢末是也今既用而廢之
則百姓頓亡其利今計度天下之穀以周天下之食或
倉庫充溢或糧靡斗儲以相資通則貧者仰富致之之

道實假於錢一朝斷之便為棄物是有錢無糧之人皆坐而饑困此斷之又立弊也且據今用錢之處不為貧用穀之處不為富又人習來久革之怨感語曰利不百不易業況又錢便於穀也魏明帝時錢廢用穀四十年矣以不便於人乃舉朝大議精才達政之士莫不以宜復用錢下無異情朝無異論彼尚捨穀帛而用錢足以明穀帛之弊著於已試也代或謂魏氏不用錢久積藏巨萬故欲行之利公富國斯殆不然晉文取舅犯之謀

而先成李之信以為雖有一時之勲不如萬代之益於
時名賢在列君子盈朝大謀天下之利害將定經國之
要術若穀實便錢義不昧當時之近利而廢永用之通
業斷可知矣斯實由困而思革改而更張耳近孝武之
末天下無事時和年豐百姓樂業穀帛殷阜幾乎家給
人足驗之事實錢又不妨人也愚謂救弊之術無取於
廢錢朝議多同琳之故玄議不行

沈約曰人生所資曰食與貨貨以通幣食

為人天是以九棘播於農皇十朋興於上代昔醇人未
漓情嗜疎寡奉生贍已事有異同一夫躬耕則餘餐委

室正婦務織則魚衣被體雖貿遷之道通用濟乏龜貝之益為功蓋輕而事有訛變姦弊大起昏作役苦故檣人去而從商商工事逸末業流而浸廣泉幣所通非復始造之意也於是競收罕至之珍遠蓄未名之貨明珠翠羽無足而馳彩蜀文犀飛不待翼天下蕩蕩咸以棄本為事豐衍則同多稔之資饑凶又減田家之蓄錢雖盈尺且不療饑於堯年貝或如山信無救渴於湯代其為疵病亦已深矣固宜一罷錢貨專用穀帛使人知役生之路非此莫由夫千疋為貨事難於懷璧萬斛為市未易於越鄉斯可使末伎自禁遊食知反而年代推移人事興替或庫盈朽貫而高廩未充或家有藏錒而良疇罕闢若事改一朝廢而莫用交易所寄朝夕無待雖致乎要術而非可卒行先宜削華止偽還醇返古抵璧幽峯捐珠清壑然後驅一代之人反耕桑之路鱣粟美溢同於水火既而蕩滌圉洪銷鑄無遺立制垂統永傳於後比屋稱仁豈伊唐代桓玄知其始而不覺其終琳

之觀其末而不統其本豈慮間塞將一往之談可然乎
前涼張軌太府參軍索輔言於軌曰古以金貝皮幣為
貨息穀帛量度之耗二漢制五銖錢通易不滯晉太始
中河西荒廢遂不用錢裂疋以為段數縑布既壞市易
又難徒壞女工不任衣用弊之甚也今中州雖亂此方
全安宜復五銖以濟通變之會軌納之立制准布用錢
錢遂大行人賴其利

通典卷八

欽定四庫全書

通典卷九

唐 京兆杜佑君卿纂

食貨九

錢幣下

宋 齊 梁 陳 隋 大唐

後魏

北齊

後周

宋文帝元嘉七年立錢署法鑄四銖文曰四銖重如其文人間頗盜鑄多翦鑿古錢取銅帝甚患之錄尚書江夏王義恭建議以一大錢當兩以防翦鑿議者多同之

何尚之議曰夫泉貝之興以估貨為本事在交易豈假數多數少則幣輕數多則物重多少雖異濟用不殊況復以一當兩徒崇虛價者也凡狃制改法宜順人情未有違衆矯物而可久也泉布廢興議自前代赤仄白金俄而罷息六貨潰亂人泣於市良由事不畫一難用遵行夫錢之形大小多品直云大錢則未知其格若止於四銖五銖則文皆古篆既非庸下所識如或漫滅尤難分明公私交亂爭訟必起此寔是深疑者也命旨兼慮

翦鑿日多以致銷盡鄙意復謂殆無此嫌人巧雖密要有蹤蹟用錢貨銅事可尋檢直由糾察不精致使立制以來發覺者寡今雖有懸金之名竟無酬與之實若申明舊科擒獲即報畏法希賞不日息矣中領軍沈演之以為龜貝行於上古泉刀興自周代皆所以阜財通利實國富人者但採鑄久廢喪亂累仍靡散湮滅何可勝計晉遷江南疆境未廓或土習其風錢不普用今封略開廣聲教遐暨金鋸布洽爰逮邊荒用彌廣而貨愈狹

加復競竊翦鑿銷毀滋繁刑雖重禁姦弊方密肆力之
眊徒勤不足以供贍誠由貨貴物賤常調未革愚謂若
以大錢當兩則國傳難朽之寶家贏一倍之利不俟加
憲巧源自絕上從演之議遂以一錢當兩行之經時公
私非便乃罷時言事者多以錢貨減少國用不足欲禁
私銅以充官鑄五銖范泰又陳曰夫貨存貿易不在多
少昔日之貴今日之賤彼此共之其揆一也但令官人
均通則無患不足若使必資廣以收國用者則龜貝之

屬自古而行銅之為器在用也博矣鍾律所通者遠機
衡所揆者大器有要用則貴賤同資物有適宜則家國
共急今毀必資之器而為無施之錢於貨則功不補勞
在用則君人俱困校之以實損多益少良由階根未固
意存遠略伏願思可久之道贖欲速之情則嘉謨日陳
聖慮可廣先是元嘉中鑄四銖錢輪郭形制與古五銖
同價無利百姓不資盜鑄孝武孝建初鑄四銖文曰孝
建一邊為四銖其後稍去四銖專為孝建三年尚書右

丞徐爰議曰：貨薄人貧，公私俱罄，不有革造，將大空乏。應式遵古典，收銅繕鑄，納贖判刑，著在往策。今宜以銅贖刑，隨罪為品，詔可之。所鑄錢形式薄小，輪郭不成，就於是人間盜鑄者雲起，雜以鉛錫，並不牢固，又翦鑿古錢，以取其銅。錢既轉小，稍違官式，雖重制嚴刑，人吏官長坐死免者，相繫而盜鑄彌甚。百物踊貴，人患苦之。乃立品格，薄小無輪郭者悉加禁斷。時議者又以銅轉難得，欲鑄二銖錢。顏竣曰：議者將謂官藏空虛，宜速改變。

天下銅少宜減錢式以救災弊賑國弔人愚以為不然
今鑄二銖恣行新細於官無解於乏而人姦巧大興天
下之貨將糜碎至盡空立嚴禁而利深難絕不過一二
年間其弊不可復救此其不可一也今鎔鑄獲利不見
有損得一二倍之理縱復得此必待彌年又不可二也
人懲大錢之改兼畏近日新禁市井之間必生紛擾富
商得志貧人困窮又不可三也況又未見其利而衆弊
如此失算當時取誚百代上不聽廢帝景和二年鑄二

銖錢文曰景和形式轉細官錢每出人間即模效之而大小厚薄皆不及也無輪郭不磨剪鑿者謂之耒子尤薄輕者謂之荇葉市井通用之永光元年沈慶之啓通私鑄由是錢貨亂改一千錢長不盈三寸大小稱此謂之鷲眼錢劣於此者謂之縊環錢入水不沈隨手破碎市井不復斷數十萬錢不盈一掬斗米一萬商貨不行明帝太始初唯禁鷲眼縊環其餘皆通用復禁人鑄官署亦廢工尋又普斷唯用古錢○齊高帝建元四年奉

朝請孔覲上書曰三吳國之關閭比歲被水潦而糴不
貴是天下錢少非穀穰賤此不可不察也鑄錢之弊在
輕重屢變重錢患難用而難用為無累輕錢弊盜鑄而
盜鑄為禍深人所盜鑄嚴法不禁者由上鑄錢惜銅愛
工也惜銅愛工也者謂錢無用之器以通交易務欲令
輕而數多使省工而易成不詳慮其患也自漢鑄五銖
錢至宋文帝四百餘年制度有廢興而不變五銖者其
輕重可法得貨之宜也以為開置錢府方督貢金大興

鎔鑄錢重五銖一依漢法府庫以實國用有儲乃量俸祿薄賦稅則家給人足頃盜鑄新錢者皆效作翦鑿不鑄大錢也唐澤滛染始皆類故交易之後渝變還新良人不習滛染不復行矣所賣鬻者皆徒失其物盜鑄者復賤買新錢滛染更用反復生詐循環起姦明主尤所宜禁而不可長也若官錢已布於人使嚴斷翦鑿小輕破缺無周郭者悉不得行官錢細小者稱合銖兩銷以爲大利貧良之人塞姦巧之路錢貨既均遠近若一百

姓樂業市道無爭衣食滋殖矣時議者以為錢貨轉少
宜更廣鑄重其銖兩以防人姦上乃使諸州大市銅會
上崩乃止武帝時竟陵王子良上表曰頃錢貴物賤殆
欲魚倍凡在觸類莫不如茲稼穡艱劬直數十機杼
勤苦足纔三百所以然者實亦有由年常歲調既有定
期僅賃所上咸是見直東閭錢多翦鑿鮮復完者公家
所受必須圓大以兩代一困於無所鞭捶質繫益致無
聊○梁初唯京師及三吳荆郢江湘梁益用錢其餘州

郡則雜以穀帛交易交廣之域則全以金銀為貨

荊州今巴

東夷陵雲安郡地郢州今江夏齊安竟陵漢陽富水郡地江州今潯陽鄱陽章郡廬陵臨川郡地湘州今湘川之地梁州今漢川之地益州今蜀川之地交廣今嶺南道之地武帝乃鑄錢肉好周郭

文曰五銖重四銖三參二黍其百文則重一斤二兩又

別鑄除其肉郭謂之公式女錢徑一寸文曰五銖重如

新鑄五銖二品並行百姓或私以古錢交易者其五銖

徑一寸一分重八銖文曰五銖三吳屬縣行之女錢徑

一寸重五銖無輪郭郡縣皆通用太平百錢二種並徑

一寸重四銖源流本一但文字古今之殊耳文並曰太平百錢定平一百五銖徑六分重一銖半文曰定平一百稚錢五銖徑一分半重四銖文曰五銖源出於五銖但狹小東境謂之稚錢五朱錢徑七分半重三銖半文曰五朱源出稚錢但稍遷異以銖為朱耳三吳行之差少於餘錢又有對文錢其源未聞豐貨錢徑一寸重四銖代人謂之富錢藏之令人富也布泉錢一寸重四銖半代謂之男錢云婦人佩之即生男也此等輕重不一

天子頻下詔書非新鑄二種之錢並不許用而趨利之徒私用轉甚至普通中乃議盡罷銅錢更鑄鐵錢人以鐵錢易得並皆私鑄及大同以後所在鐵錢遂如丘山物價騰貴交易者以車載錢不復計數而唯論貫商旅姦詐因之以求利自陂嶺以東八十為陌名曰東錢江郢以上七十為陌名曰西錢京師以九十為陌名曰長錢大同元年天子乃詔通用足陌詔下而人不從錢陌益少至於末年遂以三十五為陌○陳初承梁喪亂之

後鐵錢不行始梁末有兩柱錢及鵞眼錢於時人雜用其價同但兩柱重而鵞眼輕私家多鎔鑄又間以錫錢兼以粟帛為貨文帝元嘉五年改鑄五銖初出一當鵞眼之十宣帝太建十一年又鑄大貨六銖以一當五銖之十與五銖並行後還當一人皆不便乃相與訛言曰六銖錢有不利縣官之象未幾而帝崩遂廢六銖而行五銖竟至陳亡其嶺南諸州多以鹽米布交易俱不用錢○後魏初至太和錢貨無所用也孝文帝始詔天下

用錢十九年公鑄粗備文曰太和五銖詔京師及諸州鎮皆通行之內外百官祿皆准絹給錢足為錢二百在所遣錢工備爐冶人有欲鑄聽就鑄之銅必精鍊無所和雜宣武帝永平三年冬又鑄五銖錢京師及諸州鎮或不用或有止用古錢不行新鑄致商賈不通貿遷頗隔延昌三年有司奏長安驪山今昭應縣是有銀鑛二石得銀七兩其秋恒州時恒州今代郡安邊馬邑又上言白登山今馬邑郡界有銀鑛八石得銀七兩錫三百餘斤其色潔白有踰上

品詔並置銀官常令採鑄又漢中

今郡地

舊有金戶千餘

家常於漢水汰沙金年終輸之後臨淮王或為梁州刺史奏罷之孝明帝熙平初尚書令任城王澄上言夏殷之政九州貢金以定五品周仍其舊太公立九府之法於是圜貨始行定銖兩之楷齊桓循用以霸諸侯降及秦始漢文遂有輕重之異吳淠鄧通之錢收利徧於天下河南之地猶甚多焉逮於孝武乃造五銖其中毀鑄隨時改易故使錢有太小之品竊尋太和之錢孝文留

心矧制後與五銖並行此乃不刊之式臣竊聞之君子行禮不求變俗因其所宜順而致用太和五銖雖利於京邑之肆而不入徐揚之市

徐今彭城瑯邪郡地揚今壽春郡地

土貨既

殊貿鬻亦異便於京郢之邦者則礙於兗徐之域

荆今南陽

郡地郢今汝南郡地兗今魯郡東平郡地

致使貧人有重困之切王道貽隔

化之訟去永平三年勅不行之錢雖有常禁其先用之處權可聽行至來年末悉令斷之暨延昌二年徐州人儉刺史啓奏求行土錢旨聽權依舊用謹尋不行之錢

律有明式指謂鶩眼環鑿更無餘禁計河南諸州今所行者悉非制限昔來繩禁愚竊惑焉又河北州鎮既無新造五銖設有舊者而復禁斷並不行使以單絲之縑疎縷之布狹幅促度不中常式裂疋為尺以濟無有至令徒成杼軸之勞不免饑寒之苦良由分截布帛壅塞錢貨實非救恤凍餒子育黎元謹惟自古以來錢品不一前後歷代交易無常且錢之為名欲泉流不已臣之愚意謂今之太和與新鑄五銖及諸古錢方俗所使用

者雖有大小之異并得通行貴賤之差自依鄉價庶貨
環海內公私無壅其不行之錢及盜鑄毀大為小偽不
如法者據律罪之詔曰錢行已久今東南有事且可依
舊澄又奏謹詳周禮外府掌邦布之出入布猶泉也藏
曰泉流曰布然則錢之興也始於一品欲令代匠均同
圖流無極爰暨周景降逮亡秦易鑄相尋參差百品遂
令接境乖商連邦隔貿今謹重叅量以為太和五銖乃
大魏之通貨不朽之恒模寧可專僨於京邑不行於天

下但今戎馬在郊江疆未一東南之州依舊為便至於
京西京北域內州鎮未用錢處行之則不足為難塞之
則有乖通典何者布帛不可尺寸而裂五穀則有負擔
之難錢之為用貫錙相屬不假斗斛之器不勞秤尺之
平濟代之宜便利於此請並下諸方州鎮其太和及新
鑄并古錢內外全好者不限大小悉聽行之舊眼環鑿
依律而禁河南州鎮先用錢者既聽依舊不在斷限唯
太和五銖二錢得用公造新者其餘雜種一用古錢生

新之類晉同禁約諸方之錢通用京師其聽依舊之處
與太和錢新造五銖並行若盜鑄錢者罪重常憲既欲
均齊物品屢并斯和若不繩以嚴法無以肅茲違犯詔
從之而河北諸州舊少錢貨猶以他物交易錢略不入
於市二年冬尚書崔亮奏弘農郡銅青谷有銅鑛計一
斗得銅五兩四銖葦池谷鑛一斗得銅五兩鸞帳山鑛
一斗得銅四兩河內郡王屋山今玉山縣鑛一斗得銅八兩
南有青州苑燭山齊州商山並是往昔銅官舊迹見在

謹按鑄錢方興用銅處廣既有治利並許開鑄詔從之
自後所行之錢人多私鑄錢稍小薄價用彌賤於初乃
重制盜鑄之禁開糾賞之格孝莊帝初私鑄者益更薄
小乃至風飄水浮米斗幾直一千祕書郎楊侃奏曰昔
馬援在隴西嘗上書求復五銖錢事下三府不許及援
入為武賁中郎親對光武釋其趨向事始施行臣頃在
雍州亦表陳其事聽人與官並鑄五銖錢使人樂為而
俗弊得改旨下尚書八座不許以今況昔為理不殊求

取臣前表經御披析俚乃隨宜剖說帝從之乃鑄五銖
錢御史中尉高恭之又奏曰四民之業錢貨為本救弊
改鑄王政所先自頃以來私鑄薄濫官司糾繩挂網非
一在今銅價八十一文得銅一斤私造薄錢斤踰二百
既示之以深利又隨之以重刑得罪者雖多姦鑄者彌
衆今錢徒有五銖之文而無二銖之實薄甚榆莢上貫
便破置之水上殆欲不沈此乃因循有漸科防不切朝
廷失之彼復何罪昔漢文以五分錢小改鑄四銖至孝

武復改三銖為半兩此皆以大易小以重代輕也論今
據古宜改鑄大錢文載年號以記其始則一斤所成七
十六文銅價至賤五十有餘其中人功食料錫炭鉛沙
縱復私營不能自潤直置無利應自息心況復嚴刑廣
設以臣測之必當錢貨永通公私獲允後遂用楊倬計
永安二年秋詔更鑄文曰永安五銖錢官自立爐亦聽
人就鑄起自九月至三年正月而止官欲知貴賤乃出
藏絹分遣使人於三市賣之絹足止錢二百而私市者

猶三百利之所在盜鑄彌衆巧偽既多輕重非一四方

州鎮用各不同時鑄錢都督長史高謙之

即高恭之兄字道讓

表求鑄三銖錢曰蓋錢貨之立本以通有無便交易故

錢之輕重時代不同太公為周置九府圜法至景王時

更鑄大錢秦兼海內錢重半兩漢興以秦錢重改鑄筴

錢至孝文五年復為四銖孝武時悉復銷壞更鑄三銖

至元狩中變為五銖又造赤仄以一當五王莽攝政錢

有六等大錢重十二銖次九銖次七銖次五銖次三銖

次一銖魏文帝罷五銖至明帝復立孫權江左鑄大錢
一當五百權赤烏五年復鑄大錢一當千輕重大小莫
不隨時而變竊以食貨之要八政為首聚財之貴貽訓
典文是以昔之帝王垂天地之饒御海內之富莫不腐
紅粟於太倉藏朽貫於泉府人無困弊可以寧謐四極
如身使臂者矣昔孝武外事四夷遂虛國用鹽鐵既興
錢幣屢改少府遂豐上林饒積外闢百蠻不增賦者皆
計利之由也今羣妖未息四郊多壘徵稅既煩千金日

費資儲漸耗財用將竭誠楊氏獻說之秋桑兒言利之日夫西京之盛錢猶屢改並行小天子母相權況今寇難未除州郡淪沒人物凋零軍國用少則鑄小錢可以富益何損於政何妨於人也且政興不以錢大政衰不以錢小唯貴公私得所政化無虧既行之於古亦宜效之於今矣昔禹遭大水以歷山之金鑄錢救人之困湯遭大旱以莊山之金鑄錢贖人之賣子者今百姓窮悴甚於曩日欽明之主豈得垂拱而觀之哉臣今此鑄以

濟交之五銖之錢任使並用行之無損國得其益詔將從之事未就會卒○北齊神武霸政之初猶用永安五銖遷鄴已後百姓私鑄體制漸別遂各以為名有雍州青州梁州生厚緊錢吉錢河陽生澀天柱赤牽之稱冀州之北錢皆不行交貿者皆以絹布神武乃收境內之銅及錢仍依舊文更鑄流之四境未幾之間漸復細薄姦偽競起武定六年文襄王以錢文五銖名須稱實宜秤錢一文重五銖者聽入市用計一百文重一斤四兩

二十銖自餘皆準此為數其京邑二市天下州鎮郡縣之市各置二秤懸於市門私人所用之秤皆準市秤以定輕重凡有私鑄悉不禁斷但重五銖然後聽用若入市之錢不重五銖或雖重五銖而多雜鉛蠟並不聽用若輒以小薄雜錢入市有人糾獲其錢悉入告者其薄小之錢若便禁斷恐人交乏絕畿內五十日外州百日為限羣官參議咸以為時穀頗貴請待有年王從之而止文宣受東魏禪除永安之錢改鑄常平五銖重如其

文其錢甚貴而製造甚精其錢未行而私鑄已興一二年間即有濫惡雖殺戮不能止乃令市增長銅價由此利薄私鑄少止至乾明皇建之間往往私鑄鄴中用錢有赤郭青熟細眉赤生之異河南所用有青薄鉛錫之別青齊徐兗梁荆河等州輩類各殊武平以後私鑄轉甚或以生鐵和銅至於齊亡卒不能禁○後周之初尚用魏錢及武帝保定元年乃更鑄布泉之錢以一當五與五銖並行梁益之境又雜用古錢交易河西諸郡或

用西域金銀之錢

漢書西域傳罽賓國以銀為錢文為騎馬幕為人面幕即漫也烏弋山離

國之錢與罽賓國同文為人頭幕為騎馬加金銀飾其仄安息亦以銀為錢文為王面幕為夫人面王死即更

鑄大月氏亦同

而官不禁建德三年更鑄五行大布錢以一當

十大收商賈之利與布泉錢並行四年又以邊境之錢

人多盜鑄乃禁五行大布不得出入四關布泉之錢聽

入而不聽出五年以布泉漸賤而人不用遂廢之初私

鑄者絞從者遠配為戶齊平以後山東之人猶雜用齊

氏舊錢至靜帝大象元年又鑄永通萬國錢以一當千

與五行大布五銖凡三品並用○隋文帝開皇元年以天下錢貨輕重不一乃更鑄新錢背面肉好皆有周郭文曰五銖而重如其文每錢一千重四斤二兩

後魏食貨志云

齊文襄令錢一文重五銖者聽入市用計一百錢重一斤四兩二十銖則一千錢重十一斤以上而隋代五銖錢一千重四斤二兩是時錢既新出百姓或私有鎔鑄當是大小秤之差耳

三年詔四面諸關各付百錢為樣從關外來勘樣相似然後得過樣不同者則壞以為銅入官詔行新錢以後前代舊錢有五行大布永通萬國及常平所在勿用以

其貿易不止四年詔依舊不禁者縣令奪半年祿然百姓習用既久猶不能絕五年詔又嚴其制自是錢貨始一所在流布百姓便之是時見用之錢皆須和以錫鑪錫鑪既賤求利者多私鑄之錢不可禁約其年詔乃禁出錫鑪之處並不得私有採取十年詔晉王廣聽於揚州立五鑪鑄錢其後姦猾稍多漸磨鑪錢郭取銅私鑄又雜以鉛錫遞相倣倣錢遂輕薄乃下惡錢之禁京師及諸州邸肆之上皆令立榜置樣為準不中樣者不入

於市十八年詔漢王諒聽於并州立五鑪鑄錢又江南
人間錢少晉王廣又請於鄂州白紵山有銅鑛處鑄錢
於是詔聽置十鑪鑄錢又詔蜀王秀於益州立五鑪鑄
錢是時錢益濫惡乃令有司檢天下邸肆見錢非官鑄
者皆毀之其銅入官而京師以惡錢貿易為吏所執有
死者數年之間私鑄頗息大業以後王綱弛紊巨姦大
猾遂多私鑄錢轉薄惡每千宜重二斤後漸輕至一斤
或剪鐵鏐裁皮糊紙以為錢相雜用之貨賤物貴以至

於亡○大唐武德四年廢五銖錢鑄開通元寶錢每十

錢重一兩計一千重六斤四兩

歐陽詢為文書含八分及隸體每兩二十四銖

則一錢重二銖半以下古秤比今秤三之一也則今輕錢為古秤之七銖以上古五銖則加重二銖以上輕

重大小最為折衷遠近便之後盜鑄漸起顯慶五年以天下惡錢轉多所在官為市取五文惡錢酹一好錢其年又改以好錢一文易惡錢二文乾封元年造乾封泉寶錢直開通錢十周年以後廢二年詔開通錢依舊施行乾封錢貯儀鳳四年四月令東都出遠年糙米及粟

就市糶斗別納惡錢百文其惡錢令少府司農相知即令鑄破其厚重合斤兩者任將行用時米粟漸貴議為鑄錢漸多所以錢賤而物貴於是權停少府監鑄錢尋而復舊永淳元年五月勅私鑄錢造意人及勾合頭首者並處絞仍先決杖一百從及居停主人加役流各決杖六十若家人共犯坐其家長老疾不坐者則罪歸以次家長其鑄錢處鄰保配徒一年里正坊正村正各決六十若有糾告者即以所鑄錢毀破并銅物等賞糾人

同犯自首免罪依例酌賞武太后長安中又令懸樣於市令百姓依樣用錢俄又簡擇艱難交易留滯又降勅非鐵錫銅蕩穿穴者並許令用其熟銅排斗沙澀厚大者皆不許簡擇自是盜鑄蜂起濫惡益衆江淮之南盜鑄尤甚或就陂湖巨海深山之中鼓鑄神龍先天之際兩京用錢尤甚濫惡其私鑄小錢纔有輪郭及鐵錫之屬亦堪行用乃有買錫以錢模之斯須盈千便齎用之開元五年宋璟知政事奏請一切禁斷惡錢六年正月

詔又切禁斷天下惡錢不堪行用者并銷破覆鑄由是
四民擾駭穀帛踴貴二月又勅古者聚萬方之貨設九
府之法以通天下以便生人若輕重得中則利可和義
若真偽相雜則官失其守頃者用錢不倫此後深恐貧
窶日困姦豪歲滋所以申明舊章懸設諸樣欲其人安
俗阜禁止令行十一年制曰古者作錢以通有無之鄉
以平小大之價以全服用之物以濟單貧之資錢之所
利人之所急然絲布財穀人民為本若本賤末貴則人

棄賤而務貴故有盜鑄者冒嚴刑而不悔藏鏹者非倍
息而不出今天下泉貨益少幣帛頗輕欲使天下流通
焉可得也且銅者餒不可食寒不可衣既不堪於器用
不同於寶物唯以鑄錢使其流布宜令所在加鑄委按
察使申明格文禁斷私賣銅錫仍禁造銅器所在採銅
鉛官為市取勿抑其價務利於人二十年九月制曰綾
羅絹布雜貨等交易皆合通用如聞市肆必須見錢深
非道理自今以後與錢貨兼用違法者准法罪之二十

二年三月勅布帛不可以尺寸為交易菽粟不可以抄
勺質有無古之為錢以通貨幣頃雖官鑄所入無幾約
工計本勞費又多公私之間給用不贍永言其弊豈無
變通往者漢文之時已有放鑄之令雖見非於賈誼亦
無廢於賢君古往今來代革時異亦欲不禁私鑄其理
如何中書侍郎張九齡奏請不斷鑄錢上令百官詳議
黃門侍郎平章事裴耀卿黃門侍郎李林甫河南少尹
蕭炅等皆曰錢者通寶有國之權是以歷代禁之以絕

姦濫今若一啓此門但恐小人棄農逐利而濫惡更甚於事不便左監門衛錄事參軍劉秩上議曰古者以珠玉為上幣黃金為中幣刀布為下幣今之錢即古之下幣也今若捨之任人自鑄則上無以御下下無以事上其不可一也夫物賤則傷農錢輕則傷賈故善為國者觀物之貴賤錢之輕重夫物重則錢輕錢輕由乎物多則作法收之使少少則重重則作法布之使輕輕重之本必由乎是奈何而假於人其不可二也夫鑄錢不

雜以鉛鐵則無利雜以鉛鐵則惡如不重禁不足以懲
息方今塞其私鑄之路人猶冒死以犯之況啓其源而
欲人之從令乎是設陷穽而誘之入其不可三也夫許
人鑄錢無利則人不鑄有利則人去南畝者衆去南畝
者衆則草不墾草不墾則又隣於寒餒其不可四也夫
人富溘則不可以賞勸貧餒則不可以威禁故法令不
行人之不理皆由貧富之不齊也若許其鑄錢則貧者
必不能為臣恐貧者彌貧而復役於富室富室乘之而

益恣昔漢文之時吳濞諸侯也富埒天子鄧通大夫也財侔王者此皆鑄錢之所致必欲許其私鑄是與人利權其不可五也今必以錢重而傷本貨費而利寡則臣願言其失以效愚計夫錢重者由人鑄日滋於前而爐不加於舊又公錢重與銅之價頗等故盜鑄者破重錢以為輕錢禁寬則行禁嚴則止止則棄矣此錢之所以少也夫鑄錢用不贍者由乎銅貴銅貴之由在於採用者衆夫銅之為兵則不如鐵以為器則不如漆禁之無

害陛下何不禁於人禁於人則銅無所用銅無所用則益賤賤則錢之用給矣夫銅不布下則盜鑄者無因而鑄無因而鑄則公錢不破人不犯死刑錢又日增末復利矣是一舉而四美兼也時公卿羣官皆建議以為不便事既不行但勅郡縣嚴斷惡錢而已至天寶初年兩京用錢稍好米粟豐賤數載之後漸又濫惡府縣不許好錢加價廻博令好惡通用富商姦人漸收好錢潛將往江淮南每一錢貨得私鑄惡錢五文假託公錢將入

京私用京城錢日加碎惡驚眼鐵錫古文縱環之類每貫重不過三四斤十一載二月勅泉貨之用所以通有無輕重之權所以禁踰越故周立九府之法漢備三官之制永言適便必在隨宜如聞京城行用之錢頗多濫惡所資懲革絕其訛謬然安人在於存養化俗期於變通法若從寬事堪持久宜令所司即出錢三數十萬貫分於兩市百姓間應交易所用不堪久行用者官為換取仍限一月日內使盡庶單貧無患商旅必通其過限

輒敢違犯者一事以上並作條件處分是時京城百姓
久用惡錢制下之後頗相驚擾時又令於龍興觀南街
開場出左藏庫內排斗錢許市人博換貧弱者又爭次
不得俄又宣勅除鐵錫銅沙穿穴古文餘並依舊行用
久之乃定乾元元年有司以甲兵未息給用猶費奏鑄
乾元重寶錢每貫十斤一文當開元通寶錢一十文又
鑄重稜錢每貫重二十斤一文當開通五十文
皆鑄錢使第五琦所姦猾之人多用破錢私鑄新錢雖獲深利隨遭重

刑公私不便尋總停廢還用開元通寶錢人間無復有

乾元重稜二錢者蓋並鑄為器物矣

按天寶中諸州凡置九十九鑪鑄錢

絳州三十鑪揚潤宣鄂蔚各十鑪益鄧郴各五鑪洋州三鑪定州一鑪約每鑪役丁匠三十人每年除六月七月停作餘十月作十番每鑪約用銅二萬一千二百二十斤白鑪三千七百九斤黑錫五百四十斤約每貫錢用銅鑪錫價約七百五十文丁匠在外每鑪計鑄錢三千三百貫約一歲計鑄錢三十二萬七千餘貫文

通典卷九

欽定四庫全書

通典卷十

唐 京兆杜佑君卿纂

食貨十

漕運 秦 漢 魏 晉 後魏 隋 大唐

管子曰粟行三百里則國無一年之積粟行四百里則國無二年之積粟行五百里則衆有饑色孫武曰千里餽糧士有饑色食敵一鍾當吾二十鍾是言粟不可推

移則糴之者無利糴之處受害

按禹貢百里賦納總二百里納銓三百里納結

服四百里納粟五百里米則物重而粗者為近賦物輕而精者為遠賦若數千百里漕運其費百倍 ○秦

欲攻匈奴運糧使天下飛芻輓粟

運載芻藁令疾至故曰飛芻也輓粟謂引

車兩也音晚

起於黃腫

直瑞反又音誰

琅琊負海之郡轉輸北河

黃腫

二縣並在東萊言自東萊及琅琊緣海諸郡皆令轉輸至北河也黃即今黃縣腫即今文登縣並今東牟郡縣

琅琊今高密琅琊郡地北河今朔方之北河也

率三十鍾而致一石

六斛四斗為鍾計其

道路所費凡用百九十二斛乃得一石

○漢興高皇帝時漕轉山東之粟

以給中都官歲不過數十萬石

謂京師之官府

孝文時賈誼上

疏曰天子都長安而以淮南東道為奉地弥道數千不輕致輸郡或乃越諸侯而遠調均發徵至無狀也古者天子之地方千里中之而為都輸將繇使其遠者不出五百里而至公侯地百里中之而為都輸將繇使遠者不出五十里而至輸者不苦其繇繇者不傷其費故遠方人安及秦不能分人寸地欲自有之輸將起海上而來一錢之賦數十錢之費不輕而致也上之所得甚少而人之苦甚多也帝不能用孝武建元中通西南夷作

者數萬人千里負擔饋糧至十餘鍾致一石其後東滅朝鮮置滄海郡人徒之費擬西南夷又衛青擊匈奴取

河南地

今朔方之地

復興十餘萬人築衛朔方轉漕甚遠自

山東咸被其勞元光中大司農鄭當時言於帝曰異時關東漕粟從渭中上度六月罷而渭水道九百餘里時有難處引渭穿渠起長安傍南山下至河三百餘里徑易漕度可三月罷此損漕省卒天子以為然發卒穿漕渠以漕運大便利其後番係言漕從山東西歲百餘萬

石更底柱之險敗亡甚多而煩費穿渠引汾既皮氏汾

陰下引河既汾陰蒲坂下

皮氏今絳郡龍門縣汾陰蒲坂今河東郡寶鼎河東二縣

度可得五千頃故盡河壩棄地

壩而緣反謂緣河邊地

度可得穀

二百萬石以上穀從渭上與關中無異而底柱之東可

無復漕天子又以為然發卒作渠田數歲河移徙渠不

利田者不能償種久之河東渠田廢

語在田制上篇

其後人有

上書欲通褒斜道

褒斜二水名褒水東流入於河今漢中郡褒城縣斜水北流入渭今武功

縣及扶風郡

及漕事下御史大夫張湯湯問其事因言抵蜀

從故道多坂迴遠今穿褒斜道少坂近四百里而褒水
通沔斜水通渭皆可以行船漕漕從南陽上沔入褒褒
之絕水至斜間百餘里以車轉從斜下渭如此漢中之
穀可致山東從沔無限便於底柱之漕且褒斜材木竹
箭之饒擬於巴蜀天子然之拜湯子卬為漢中守發數
萬人作褒斜道五百餘里道果便近而水多湍石不可
漕孝宣即位百姓安土歲數豐穰穀石五錢農人少利
時耿壽昌以善為算能商功利得幸於上

商度也

五鳳中

奏言故事歲漕關東穀四百萬斛以給京師用卒六萬

人宜糴三輔弘農河東上黨太原等郡穀

三輔今京兆扶風馮翊郡

地弘農今陝郡地河東今河東絳郡平陽郡地上黨今高平上黨樂平陽平燕城太原今太原西河郡地足

供京師可以省關東漕卒過半天子從其計御史大夫

蕭望之奏言壽昌欲近糴漕關內之穀築倉理船費直

二萬萬餘

萬萬億也

有動衆之功恐生旱氣人被其災壽昌

習於商功分銖之事其深計遠慮誠未足任宜且如故

帝不聽漕事果便○魏齊王正始四年司馬宣王使鄧

艾行陳項以東至壽春

自今淮陽郡以至於今壽春郡

艾以為田良水

少不足以盡地利宜開河渠可以大積軍糧又通運漕

之道宣王從之乃開廣漕渠東南有事興衆泛舟而下

達於江淮資食有儲而無水害艾所建也

語在屯田篇蜀相諸葛孔

明出軍至祁山今扶風縣始以木牛運其後又出斜谷以流馬運按亮集督軍龐力杜叡滿元胡忠推意作一腳木牛其法方腹曲頭一脚四足頭入領中舌着於腹載多而行少宜住可大用不可小使特行者數十里羣行者二十里曲者為牛頭雙者為牛脚橫者為牛領轉者為牛足覆者為牛背方者為牛腹垂者為牛舌曲者為牛肋刻者為牛齒立者為牛角細者為牛鞅攝者為牛鞅勒牛御雙轅人行六尺牛行四步載一歲糧日行二

十里而人不大勞牛不飲食流馬法曰尺寸之數肋長三尺五寸廣三寸厚二寸二分左右同前軸孔分墨去頭四寸徑中二寸前腳孔分墨去頭四寸徑中二寸前腳孔分墨去前軸孔四寸五分長一寸五分廣一寸前扛孔去前腳孔分墨二寸七分孔長二寸廣一寸後軸孔去前扛孔分墨一尺五寸大小與前同後扛孔去腳孔分墨二寸二分後扛孔分墨四寸五分前扛長一尺八寸廣二寸厚一寸五分後扛與等板方囊二枚板厚八分長二尺七寸高一尺六寸五分廣一尺六寸收板受米二斛三斗從上扛孔去肋下七寸前後同上扛孔去下扛孔分墨一尺三寸孔長一寸五分廣七分八孔同前後四腳廣二寸厚一寸五分形制如象軒長四寸徑面四寸三分孔徑中三腳扛長二尺
○晉武帝太始一寸廣一寸五分厚一寸四分扛同前

十年鑿陝南山決河東注洛以通運漕

雖有此議懷帝竟未成功

永嘉元年脩千金竭於許昌以通運

竭烏割反擁也

成帝咸和

六年以海賊寇抄運漕不繼發王公以下千餘丁各運

米六斛穆帝時頻有大軍糧運不繼制王公以下十三

戶共借一人助度支運○後魏自徐揚內附之後

徐州今彭

城揚州今壽春

仍代經略江淮於是轉運中州以實邊鎮百姓

疲於道路有司請於水運之次隨便置倉乃於小平石

門白馬津漳涯黑水濟州陳郡大梁凡八所各立邸閣

每軍國有須應機漕引自此費役微省時三門都將薛

欽上言計京西水次汾華二州恒農河北河東平陽等
郡年常綿絹及紩麻皆折公物僱車牛送京道險人弊
費公損私略計華州一車官酬絹八疋三丈九尺別有
私人僱價布八十疋河東一車官酬絹五疋二丈別有
私人僱價布五十疋自餘州郡雖未練多少推之遠近
應不減此今求車取僱絹三疋市材造船不勞採砍計
船一艘舉十三車車取三疋合有三十九疋僱作手并
匠及船上雜具食直足以成船計一船賸絹七十八疋

布七百八十疋又租車一乘官格二十斛成載私人僱
價遠者五斗布一疋近者一石布一疋准其私費一車
有布遠者八十疋近者四十疋造船一艘計舉七百石
准其僱價應有千四百疋今取布三百疋造船一艘并
船上覆理雜事計一船有賸布千一百疋又其造船之
處皆須鋸材人功并削船茹依功多少即給當州郡門
兵不假更召汾州有租庸調之處去汾不過百里華州
去河不滿六十並令計程依舊酬價車送船所船之所

運唯達濡陂其陸路從濡陂至倉門調一車僱絹一疋
租一車布五疋則於公私為便尚書度支郎中朱元旭
計稱今校薛欽之說雖蹟驗未彰而指況甚善所云以
船代車是策之長者若以門兵造船便為闕彼防禦無
容全依宜令取僱車之物市材就作及倉庫所須悉以
營辦七月之始十月初旬令州郡綱典各受租調於所
在然後付之十車之中留車士四人佐其守護粟帛上
船之日隨運至京將共監慎如有耗損同其陪徵河中

缺失專歸運司輸京之時聽其即納不得雜合違失常體必使量上數下謹其受入自餘一如其例計底柱之難號為天險迅驚千里未易其功然既陳便利無容輒抑若効充其說則附例酬庸如其不驗徵填所損今始開朔不可縣生減折且依請營立一年之後須知贏費歲遣御史校其虛實脫有乖越別更量裁尚書崔林按欽所列實允事宜郎中之計備盡公理但舟楫所通遠近必至苟利公私不宜止在前件昔人乃遠通褒斜利

關中之漕南達交廣以增京洛之饒况乃漳洹夷路

洹音

桓河濟平流而不均彼省煩同茲巨益請諸通水之處
皆宜率同此式縱復五百三百里車運水次校計利饒
猶為不少其欽所列州郡如請興造東路諸州皆先通
水運今年租調悉用舟楫若船數有缺且賃假充事比
之餽車交代息耗其先未通流宜遣檢行閑月修葺使
理有可通必無壅滯如此則發召匪多為益實廣一爾
輓勞久安永逸詔從之而未能盡行也孝文太和七年

薄骨律鎮將刁雍上表曰奉詔高平安定統萬

薄骨律鎮今靈

武郡高平今平涼郡安定即今郡統萬今朔方郡也

及臣所守四鎮出車五千乘

運屯穀五十萬斛付沃野鎮以供軍糧臣鎮去沃野八
百里道多深沙輕車往來猶以為難設令載穀二十石
每至深沙必致滯陷又穀在河西轉至沃野越渡大河
計車五千乘運十萬斛百餘日乃得一返大廢生人耕
墾之業車牛艱阻難可全至一歲不過三運五十萬斛
乃經三年臣聞鄭白之渠遠引淮海之粟汴流數千周

年乃得一至猶稱國有儲糧人用安樂求於嶂岷山

今在

平涼郡高平縣今竿頭山語訛亦曰汧屯山即嶂岷山

河水之次造船二百艘二

船為一舫一船勝二千斛一舫十人計須千人臣鎮內之兵率皆習水一運二十萬斛方舟順流五日而至自沃野牽上十日還到合六十日得一返從三月至九月三返運送六十萬斛計用人工輕於車運十倍有餘不費牛力又不廢田詔曰知欲造船運穀一冬即大省人力既不費牛又不廢田甚善非但一運自可永以為式

○隋文帝開皇三年以京師倉廩尚虛議為水旱之備
詔於蒲陝號熊伊洛鄭懷汾衛汴許汝等水次十三州

熊州今福昌縣伊州今陸渾縣
汾州今絳郡垣縣餘並今郡置募運米丁又於衛州

置黎陽倉陝州置常平倉華州置廣通倉衛陝華並今郡轉相

灌注漕關東及汾晉之粟以給京師又遣倉部侍郎韋

瓚向蒲陝以東募人能於洛陽運米四十石經底柱之

險達於常平者免其征戍其後以渭水多沙流有深淺

漕者苦之四年詔宇文愷率水工鑿渠引渭水自大興

城

即今西京城也

東至潼關三百餘里名曰廣通渠轉運通利

關內賴之煬帝大業元年發河南諸郡男女百餘萬開

通濟渠自西苑引穀洛水達於河又引河通於淮海自

是天下利於轉輸四年又發河北諸郡百餘萬衆開永

濟渠引沁水南達於河北通涿郡

今范陽郡涿竹角反

自是丁男

不供始以婦人從役五年於西域之地置西海鄯善且

末等郡

逐吐谷渾得其地並在今酒泉張掖晉昌郡之北今悉為北狄之地鄯音善且子餘反

謫

天下罪人配為戍卒大開屯田發四方諸郡運糧以給

之七年冬大會涿郡分江淮南兵配驍衛大將軍來護
兒別以舟師濟滄海舳艫數百里並載軍糧期與大兵

會於平壤

高麗所都

○大唐咸亨三年於岐州陳倉縣東南

開渠引渭水入昇原渠通船棧至京故城

棧音伐京故城即長安城

漢惠帝所築在今大興城之西北苑中

開元十八年玄宗問朝集使利害

之事宣州刺史裴耀卿上便宜曰江南戶口稍廣倉庫
所資唯出租庸更無征防緣水陸遙遠轉運艱辛功力
雖勞倉儲不益竊見每州所送租及庸調等本州正月

二月上道至揚州入斗門即逢水淺已有阻礙須停留
一月以上三月四月後始渡淮入汴多屬汴河乾淺又
船運停留至六月七月後始至河口即逢黃河水漲不
得入河又須停一兩月待河水小始得上河入洛即漕
路乾淺船艘隘閘般載停滯備極艱辛計從江南至東
都停滯日多得行日少糧食既皆不足折欠因此而生
又江南百姓不習河水皆轉催河師水手更為損費伏
見國家舊法往代成規擇制便宜以垂長久河口元置

武牢倉江南船不入黃河即於倉內便貯輦縣置洛口
倉船從黃河不入洛水即於倉內安置爰及河陽倉栢
崖倉太原倉永豐倉渭南倉節級取便例皆如此水通
則隨近運轉不通則且納在倉不滯遠船不憂欠耗比
於曠年長運利便一倍有餘今若且置武牢洛口等倉
江南船至河口即却還本州更得其船充運并取所減
腳錢更運江淮變造義倉每年剩得一二百萬石即數
年之外倉廩轉加其江淮義倉多為下濕不堪久貯若

無般運三兩年色變即給貸費散公私無益疏奏不省
至二十一年耀卿為京兆尹京師雨水害稼穀價踴貴
耀卿奏曰伏以陛下仁聖至深憂勤庶務小有饑乏降
詔哀矜躬親支計救其危急今既大駕東巡百司扈從
諸州及三輔先有所貯且隨見在發重臣分道賑給計
可支一二年從東都廣漕運以實關輔待稍充實車駕
西還即事無不濟臣以國家帝業本在京師萬國朝宗
百代不易之所但為秦中地狹收粟不多儻遇水旱便

即匱乏往者貞觀永徽之際祿廩數少每年轉運不過
一二十萬石所用便足以此車駕久得安居今昇平日
久國用漸廣每年陝洛漕運數倍於前支猶不給陛下
數幸東都以就貯積為國大計不憚劬勞皆為憂人而
行豈是故欲來往若能更廣陝運支入京倉廩常有二
三年糧即無憂水旱今日天下輸丁約有四百萬人每
丁支出錢百文充陝洛運脚五十文充營窖等用貯納
司農及河南府陝州以充其費租米則各隨遠近任自

出脚送納東都至陝河路艱險既用陸脚無由廣致若能開通河漕變陸為水則所支有餘動盈萬計且江南租船所在候水始敢進發吳人不便河漕由是所在停留日月既淹遂生隱盜臣請於河口置一倉納江南租米便令江南船迴其從河口即分入河洛官自催船載運河運者至三門之東置一倉既屬水險即於河岸傍山車運十數里至三門之西又置一倉每運置倉即般下貯納水通即運水細便止漸至太原倉沂河入渭更

無停留所省巨萬臣常任濟定冀等三州刺史詢訪故
事前漢都關內年月稍久及隋亦在京師緣河皆有舊
倉所以國用常贍若依此行用利便實深上大悅尋以耀卿
為黃門侍郎同中書門下平章事勅鄭州刺史崔希逸及
河南少尹蕭炅自江淮至京以來檢古倉節級貯納仍
以耀卿為都轉運使於是始置河陰縣及河陰倉河清
縣置栢崖倉三門東置集津倉三門西置三門倉開三
門北山十八里陸行以避湍險自江淮西北沂瀉溝悉

納河陰倉自河陰候水漲涸漕送含嘉倉又取曉習河水者遞送納於太原倉所謂北運也自太原倉浮渭以實關中凡三年運七百萬石省脚三十萬貫耀卿罷相後緣邊運險澀頗有欺隱議者又言其不便事又停廢二十七年河南採訪使汴州刺史齊澣以江淮漕運經淮水波濤有沈損遂開廣濟渠下流自泗州虹縣至楚州淮陰縣北十八里合於淮不踰時畢功既而以水流浚急行旅艱險旋即停廢却由舊河二十九年陝州刺

史李齊物避三門河路急峻於其北鑿石渠通運船為漫流河泥旋填淤塞不可漕而止天寶三年左常侍兼陝州刺史韋堅開漕河自苑西引渭水因古渠至華陰

入渭引永豐倉及三門倉米以給京師名曰廣運潭以

堅為天下轉運使

漕漕二水會於漕渠每憂大雨輒皆填淤大厯之後漸不通舟

天寶

中每歲水陸運米二百五十萬石入關

舊於河南路運至陝郡太原倉

又運至永豐倉及京太倉開元初河南尹李傑始為陸運使從含嘉倉至太原倉置八遞場相去每長四十里每歲冬初起運八十萬石後至一百萬石每遞用車八百乘分為前後交兩月而畢其後漸加至天寶七年運

二百五十萬石每遞用車千八百乘自九月至正月畢
天寶九年九月河南尹裴迥以遞重恐傷牛於是以遞
場為交場兩遞簡擇近水處為宿場分官押之兼
防其盜竊大歷後水陸運每歲四十萬石入關

鹽鐵

周 漢 大 唐

後漢

陳

後魏

後周

隋

管子曰海王之國

海王者言以負海之利謹正鹽筴正稅

也音征

十口之家十人食鹽百口之家百人食鹽終月大

男食鹽五升少半

少半猶劣薄也

大女食鹽三升少半吾子食

鹽二升少半

吾子謂小男小女也

此其大歷也

歷數

鹽百升而釜

鹽十

二兩七銖一黍十分之一為升當米六合四勺也百升
之鹽七十六斤十二兩十九銖二釐為釜當米六斗四

升今鹽之重升加分强釜五十也

分强半强也今使鹽官稅其鹽之重每一

斗加半合為强而取之則一釜之鹽得五十合而謂之强

升加一强釜百也升加二

强釜二百也鍾二千

十釜之鹽七百六十八斤為鍾當米六斛四斗是

十鍾二

萬百鍾二十萬千鍾二百萬萬乘之國人數開口千萬

也

舉其大數而言之也開口謂大男大女之所食鹽也

禹筭之商日二百萬

禹讀為偶

偶對也商計也對其大男大女食鹽者之口數而立筭以計所稅之鹽一日計二百萬合為二百鍾

十日

二千萬一月六千萬萬乘之國正九百萬也

萬乘之國大男大女食鹽

者千萬人而稅之鹽一日二百鍾十日二千鍾一月六千鍾也今又施其稅數以千萬人如九百萬人之數則

所稅之鹽一日百八十鍾十日月人三十錢之籍為錢
千八百鍾一月五千四百鍾

三千萬

又變其五千四百鍾之鹽而籍其錢計一月每人籍錢三十凡千萬人為錢三萬萬矣以此

籍之數而比其常籍當一國而有三千萬人矣

今吾非籍之諸君吾子而有二

國之籍者六千萬

諸君謂老男老女也六十以上為老男五十以上為老女也既不籍於老

男老女又不籍於少男少女乃能以千萬人而當三千萬人者蓋鹽官之利耳鹽官之利既然則鐵官之利可

知也鹽官之利當一國而三千萬人鐵官之利當一國而三千萬人焉故能有二國之籍者六千萬人耳其常

籍入之數猶在此外使君施令曰吾將籍於諸君吾子則必罵號

今天給之鹽策則百倍歸於上人無以避此者數也今

鐵官之數曰一女必有一鍼一刀若其事立若猶耕者

必有一耒一耜一鉋若其事立大鋤謂之行服連輩名

載作器人挽者軺羊昭反輦居玉反者大車駕馬必有一斤一鋸一錐一

鑿若其事立不爾而成事者天下無有今鍼之重加一

也三十鍼一人之籍鍼之重每十分加一分為強而取之則一女之籍得三十鍼也矣

刀之重加六五六三十五刀一人之籍也刀之重每十分加六分以

為強而取之五六為三十耜鐵之重加七三耜鐵一人

之籍也耜鐵之重每十分加七分以為強而取之則一農之籍得三耜鐵也其餘輕重皆

准此而行

其器彌重其加彌多

然則舉臂勝

音升

事無不服籍者桓

公曰然則國無山海不王乎管子曰因人之山海假之

名有海之國

雖無海而假名有海則亦雖無山而假名有山

售鹽於吾國

彼國有鹽

而糴於吾國為售耳

釜十五吾受而官出之以百

受取也假令彼鹽平價釜當十

錢者吾又加五錢而取之所以來之也既得彼鹽則令吾國鹽官又出而糴之釜以百錢也

我未與

其本事也

與用也本

受人之事以重相推

以重相推謂加五錢之類

也推猶度也

此人用之數也

彼人所有而皆為我用也

又曰齊有渠展之

鹽

渠展齊地沛水所流入海之處可煮鹽之所也故曰渠展之鹽

請君伐蕘新

草枯曰蕘采居

反煮水為鹽

煮海水

正

音征

而積之十月始正至於正月成

三萬鍾下令曰孟春既至農事且起大夫無得繕冢墓

理宮室立臺榭築墻垣北海之衆無得聚庸

庸功也

而煮

鹽

北海之衆謂北海煮鹽之人本意禁人煮鹽下令託以農事慮有妨奪先自大夫起欲人不知其機斯為

權術

此則坐長十倍以令糴之梁趙宋衛濮陽彼盡餽食

之國

本國自無鹽遠餽而食

無鹽則腫守圉之國

圉與禦同古通用

用鹽

獨甚桓公乃使糴之得成金萬斤○漢孝武中年大興

征伐財用匱竭於是大農上鹽鐵丞孔僅東郭咸陽言

山海天地之藏皆宜屬少府陛下弗私以屬大農佐賦

願募民自給費因官器作者煮鹽官與牢盆

牢價直也今世人言僱手

半牢盆煮鹽盆也

浮食竒民欲擅管山海之貨

若人執倉庫之管籥

以致

富羨

羨饒也

役利細民其沮事之議

沮才據反

不可勝聽敢私

鑄鐵器者煮鹽者鈇左趾

鈇音徒計反足鉗也

沒其器物郡不出鐵

者置小鐵官

鑄故鐵

使屬在所縣使僅咸陽乘傳舉行天

下鹽鐵

舉皆也普天之下皆行之

作官府

主煮鑄及出納

除故鹽鐵家富者

為吏吏益多賈人矣卜式為御史大夫

元鼎六年

見郡國多

不便縣官作鐵器苦惡

謂作鐵器民患苦其不好

價貴或強令民買

之而船有算商者少物貴乃因孔僅言船算事上不說

又董仲舒說上曰今鹽鐵之利二十倍於古人必病之

孝昭元始六年令郡國舉賢良文學之士問以民所疾

苦教化之要皆對曰願罷鹽鐵酒榷均輸官無與天下

爭利示以儉節然後教化可興御史大夫桑弘羊難詰

難詰

議者之言

以為此國家大業所以制四夷安邊足用之本往

者豪強之家得管山海之利采石鼓鑄煮鹽一家聚或

至千餘人大抵盡流放之人遠去鄉里棄墳墓依倚大
家相聚深山窮澤之中成姦偽之業家人有寶器尚猶
柙而藏之況天地之山海乎夫權利之處必在山澤非
豪人不能通其利異時鹽鐵未籠布衣有胸鄙人君有
吳王專山澤之饒薄賦其人贍窮之以成私威積而逆
節之心作今縱人於權利罷鹽鐵以資強暴遂其貪心
衆邪羣聚私門成黨則強禦日以不制而并兼之徒姦
形成矣鹽鐵之利佐百姓之急奉軍旅之費不可廢也

文學曰人庶藏於家諸侯藏於國天子藏於海內是以王者不蓄下藏於人遠浮利務民之義義禮立則人化上若是雖湯武生存於代無所容其慮工商之事歐冶之任何姦之能成三桓專魯六卿分晉不以鹽冶故權利深者不在山海在朝廷一家害百姓在蕭牆不在胸邴大夫曰山海有禁而人不傾貴賤有平而人不疑縣官設衡立準而人得其所雖使五尺童子適市莫之能欺今罷之則豪人擅其用而專其利也文學曰山海者

財用之實路鐵器者農夫之死士死士用則仇讎滅田野闢而五穀熟實路開則百姓贍而人用給人用給則富國而教之以禮教之以禮則行道有讓而人懷敦朴以相接而莫相利也夫秦楚燕齊士力不同剛柔異氣巨小之用倨勾之宜黨殊俗異各有所便縣官籠而一之則鐵器失其宜而農人失其便器用不便則農夫罷於野而草萊不闢草萊不闢則人困乏也大夫曰昔商君理秦也設百倍之利收山澤之稅國富人彊蓄積有

餘是以征伐敵國攘地斥境不賦百姓軍師以贍故利
用不竭而人不知地盡西河而人不苦今鹽鐵之利所
以佐百姓之急奉軍旅之費務於積蓄以備乏絕所給
甚衆有益於用無害於人文學曰昔文帝之時無鹽鐵
之利而人富當今有之而百姓困乏未見利之所利而
見其所害且利非從天來不由地出一取於人間而謂
之百倍此計之失者也夫李梅實多者來年為之衰新
穀熟舊穀為之虧自天地不能滿盈而況於人乎故利

於彼者必耗於此猶陰陽之不並晝夜之代長短也商

鞅峭

七叫反

法長利秦人不聊生相與哭孝公其後秦日

以危利蓄而怨積地廣而禍構惡在利用不竭乎於是

丞相奏曰賢良文學不明縣官事猥以鹽鐵為不便宜

罷郡國榷酤關內鐵官詔曰可於是利復流下庶人休

息孝元時嘗罷鹽鐵官三年而復之○後漢明帝時尚

書張林上言鹽鐵食之急者雖貴人不得不須官可自

弼獻帝建安初關中百姓流入荊州者十餘萬家

荊州今襄

陽及聞本土安寧皆企願思歸而無以自業於是衛覬
議以為鹽者國之大寶自喪亂以來放散今宜依舊置
使者監賣以其直益市犂牛百姓歸者以供給之勸耕
積粟以豐殖關中遠者聞之必多還境魏武於是遣謁
者僕射監鹽官移司隸校尉居弘農流人果還關中豐
實○陳文帝天嘉二年太子中庶子虞荔御史中丞孔
奐以國用不足奏立煮海鹽稅從之○後魏宣武時河
東郡有鹽池舊立官司以收稅利先是罷之而人有富

彊者專擅其用貧弱者不得資益延興末復立監司量其貴賤節其賦入公私兼利孝明即位復罷其禁與百姓共之自後豪貴之家復乘勢占奪近池之人又輒障怙神龜初太師高陽王雍太傅清和王懌等奏請依先朝禁之為便於是復置監官以監檢焉其後更罷更立至於永熙自遷鄴後於滄瀛幽青四州之境傍海煮鹽滄州置竈一千四百八十四瀛州置竈四百五十二幽州置竈百八十青州置竈五百四十六又於邯鄲置竈

四計終歲合收鹽二十萬九千七百八斛四斗軍國所
資得以周贍矣○後周文帝霸政之初置掌鹽之政令
一曰散鹽煮海以成之二曰監鹽引池以化之三曰形
鹽掘地以出之四曰飴鹽於戎以取之凡監鹽每池為
之禁百姓取之皆稅焉○隋開皇三年通鹽池鹽井並
與百姓共之○大唐開元元年十二月左拾遺劉彤論
上鹽鐵表曰臣聞漢孝武之時外討戎夷內興宮室殫
費之甚十倍當今然而古費多而貨有餘今用少而財

不足者何也豈非古取山澤而今取貧人哉取山澤則
公利厚而人歸於農取貧人則公利薄而人去其業故
先王作法也山海有官虞衡有職輕重有術禁發有時
一則專農二則饒國夫煮海為鹽採山鑄金伐木為室
豐餘之輩也寒而無衣饑而無食傭賃自資者窮苦之
流也若能收山海厚利奪豐餘之人寬調斂重徭免窮
苦之子所謂損有餘而益不足帝王之道可不謂然乎
臣願陛下詔鹽鐵伐木等官各收其利貿遷於人則不

及數年府有餘儲矣然後下寬大之令蠲窮獨之徭可
以惠羣生可以柔荒服雖戎狄未服堯湯水旱無足虞
也玄宗令宰臣議其可否咸以鹽鐵之利甚益國用遂
令將作大匠姜師度戶部侍郎強循俱攝御史中丞與
諸道按察使檢責海內鹽鐵之課二十五年倉部格蒲
州鹽池令州司監當租分與有力之家營種之課收鹽
每年上中下畦通融收一萬石仍差官人檢校若陂渠
穿穴所須功力先以營種之家人丁充若破壞過多量

力不齊者聽役隨近人夫又屯田格幽州鹽屯每屯配
丁五十人一年收率滿二千八百石以上准營田第二
等二千四百石以上准第三等二千石以上准第四等
大同橫野軍鹽屯配兵五十人每屯一年收率千五百
石以上准第二等千二百石以上准第三等九百石准
第四等又成州長道縣鹽井一所並節級有賞罰蜀道
陵綿等十州鹽井總九十所每年課鹽都當錢八千五
十八貫

陵州鹽井一所課都當二千六十一貫綿州井
四所都當錢二百九十二貫資州井二十八所

都當錢一千八十三貫瀘州井五所都當錢一千八百五十貫榮州井十三所都當錢四百貫梓州都當錢七百一十七貫遂州四百一十五貫閬州一若閏月共計千七百貫普州二百七貫果州二十六貫

加一月課隨月徵納任以錢糧兼納其銀兩別常以二

百價為估其課依都數納官欠即均徵電戶

自兵興上元以後天

下出鹽各置鹽司節級權利

每歲所入九百餘萬貫文

通典卷十